

Dithero tsa Tirelano mo Kutlwanong

Thero ka Sontaga o o bidiwang Judika, e le ka 25. 03. 2012

18/2012

MO LEINENG LA MODIMO O E LENG RARA LE MORWA LE MOWA O O BOITSHEPO!

1. Sefela sa 216 - 201/209

2. Thapelo: Morena Modimo, re lebogela phatlha eno ya gore re kopane mono go go tumisa, wena Rara yo o rategang. Re a kopa gore re gogiwe ke wena, Modimo o o tshelang, mo tirelong ya kajeno. O re femele mo dithateng tsa ga Satane, le mo go tsotlhe tse di maswe tse di ratang go re kgaoganya le wena. Rraetsho wa bopelotlhomogi, re a kopa gore o tiise tumelo ya rona, o re fe ka yona gore re itshwarelele mo go wena, go ya mo letsatsing la go tloga mo lefatsheng. Re rapelela bareri ba Lefoko la gago mo mafatsheng otlhe. O re fe le rona thata gore tiro ya gago ya go rera Efangele, re e dire ka tlhoafalo le ka go ikanyega ka metlha. Ka bopelotlhomogi jwa gago, Morena, re baya balwetsi ba ba lwalang ka mefuta-futa ya malwetse mo loratong lwa gago gore o nne le bone, le rona o re femele mo dintshong tse di senyang. Merafe yotlhe a e itse, Morena, gore wena o Modimo wa nnete. Re kopa tsotlhe tseo mo leineng la Morena wa rona Jesu Keresete. Amen.

3. Epistolo ka fa thulaganyong ya 2 e kwadilwe mo go Bahebere 5:7-9;
Efangele ka fa thulaganyong ya 1 e kwadilwe mo go Mareko 10:35-45.

4. A go ipolelwe tumelo ya bokeresete!

5. Sefela sa 89 - 82/104

6. Thapelo ya mmadi wa thero.

7. Lefoko la thero ka fa thulaganyong ya 4 le kwadilwe mo go

Numeri 21:4-9, le re: "Jaanong ba bothologa kwa thabeng ya Hore, ba ya kwa Lewatleng la Motlhaka go potologa lefatshe la Baetomo. Ke fa batho ba fela pelo mo tseleng. Batho ba be ba ngongoregela Modimo le Moše ba re: 'Lo re ntshedseng kwa Egepeto gore re swele mo sekakeng? Gonne fano ga go na dijo, ga go na metsi, re bile re tennwe ke dijo tsa Mmana tse di bosula.' Ke fa MORENA a romela dinoga tse di bolayang mo morafeng, tsa loma batho, mme batho ba bantsi ba Baiseraele ba swa. Jaanong batho ba ya kwa go Moše ba re: 'Re leofile, gonne re ngongoregetse MORENA le wena. Rapela MORENA gore a tlose dinoga mo go rona.' Moše a ba a rapelela morafe. MORENA a raya Moše a re: 'Dira noga, o e pege mo koteng; foo mongwe le mongwe yo o lomilweng, fa a e leba, o tla tshela.' Ke fa Moše a dira noga ya kgotlho, a e pega mo koteng. Mme e ne ya re fa noga e loma motho, mme a leba noga ya kgotlho, a tshele." Amen.

8. Thero: Phuthego e e rategang ya Morena wa rona Jesu Keresete, Lefoko la thero ya kajeno le bua ka ga tsamao ya bana ba Iseraele ya go ya kwa Kanana. Botshelo jwa bone bo ne bo le bokete mo Lefatsheng la Egepeto. Ka moo Modimo o ne wa otlolola seatla sa nonofo sa ona go ba golola mo lefatsheng la bokgoba. Ke re: Le fa Baiseraele ba lebisitse difatlhego tsa bone mo lefatsheng la tsholofetso, go ne go se botlhofo, jaaka Lefoko le re: Ke fa batho ba fela pelo mo tseleng. Batho bao ba ne ba sa diege go ngongoregela Moše le Modimo ka ntlha ya matshwenyego a bone. Fela Moše e le moeteledipele o romilwe ke Modimo gore a ba ntshe kwa Egepeto. Go ne go se na matshwenyego fela a a dirileng gore ba ngongorege, mme bogolo ba ne ba botsa malebana le maikaelelo a go ntshiwa kwa Egepeto. Batho ba ne ba gopola gore Moše le Modimo ba ne ba batla gore batho ba swele mo sekakeng. Ba re: Ke ka ntlha ya moo, fa go ne go se na senkgwe le metsi. Ba setse ba lapile ka ntlha ya sejo se ba se filweng ke Modimo, ba re: Ba tennwe ke dijo tsa Mmana tse di bosula. Sejo se ne se le teng, mme batho bao ba ne ba sa tlhole ba bona, fa e le sejo tota, fa ba ne ba se phadisanya le sejo se ba se tlwaetseng. Mmana o Modimo o o ba abetseng ba ne ba o nyatsa, ba re: Ga se sejo, ba re: Ga o thuse sepe. Ke nnete, ga diragala kwa sekakeng gore batho ba gopole Egepeto, ba re: Bokete jwa teng ga bo a lekana le jona jo bo ba tshwenyang kwa sekakeng.

Modimo wa ba betsa ka go ba romela dinoga gore di ba lome. Ba ikgogetse metsi ka mosele, gonne ba ne ba ngongorega mo boemong jwa go leboga Modimo ka ntlha ya se o se ba diretseng. Ke fa ba longwa ke dinoga. Mme mo matshwenyegong a bone, fa ba lemoga gore ba tla swa, ba ya go Moše, ba ipolela maleo a bone a go bua maswe ka ga Modimo le ka ga Moše, modiredi wa ona. Go bediwa ga bone go ba gogetse mo tshabologong, le go ipolela boleo jwa go nyatsa bagolo. Ba kopa Moše

gore a ba rapelele mo Modimong gore dinoga di tloge. Ke fa Moše a supa bogolo jwa gagwe, fa e le mmueledi wa batho mo Modimong. Bana ba Iseraele ba tlhaloganya sentle gore ka tlhabologo le ka thapelo fela ba ka ntshiwa mo kotsing e ba itsentseng mo go yona. Modimo wa araba thapelo ya ga Moše ka go mmolelela gore a dire noga ya kgotlho, a e pege mo koteng foo mongwe le mongwe yo o lomilweng, fa a e leba, o tla tshela. Ke fa Moše a dira noga ya kgotlho, a e pega mo koteng. E ne ya re fa noga e loma motho, mme a leba noga ya kgotlho, a tshela. Noga eo ke ya kgotlho, mme ka ntlha ya bopelotlhomogi jwa Modimo e ne e se na botlhole. Mo boemong jwa go bolawa ka go longwa ke yona, batho ba ne ba tshediswa ka go e leba. Gararo noga eo e a umakiwa, ya dirwa ka kgotlho, ya bewa go nna lotshwao lwa pholoso mo go ba ba e lebileng. E ne e se noga ya kgotlho e e neng ya pholoso ya batho, mme e ne e le Modimo ka osi, jaaka re utlwa mo go 1 Dikg. 18:4 gore kgosi Hesekia o ne a pšhwetlakanya noga eo ya kgotlho. Ke tshwanelo gore re tlhokomele gore Modimo o betsa boleo ka boleo, mme ga go diragale gore o alafe boleo ka boleo. Fano ga go diragale gore mutlwa o ntshiwe ka mutlwa. Baiseraele ba ne ba dumela gore fa ba leba noga ya kgotlho, ba tla tshela tota. Go bonala jalo, fa re gopola gore noga eo e umakiwa gape mo go Johane 3:14-15 ka gore Morwa-Motho o tshwanetse go tlhatlosiwa, jaaka Moše a kile a tlhatlosa noga mo sekakeng gore mongwe le mongwe yo o dumelang mo go ene, a se latlhege, mme a nne le botshelo jo bo sa khutleng.

Ke nnete, a re ithuteng gore re se bue se se maswe ka ga Modimo, gonne go bua maswe go re gogela mo petsong. A Leina la Modimo le se ka la dirisiwa mo go sa tshwanelang, le fa e le ka tsela efe, jaaka re bona mono gore ba na le mmama, mme ba re: Ke sejo se se bosula. Rraetsho yo o mo legodimong ga a na maikaelelo a a maswe ka rona. O re goga ka boammaaruri, gape o re direla molemo. Le fa go nte jalo, re ka kopana le kemo e e ntseng jang, gongwe re gopola gore re mo sekakeng, mme ke tshwanelo gore re amogele ka tebogo tse re di abelwang ke Modimo. Mme pelo ga e itumedisiwe, e ntse fela e eletsa, e gogela mo lebitleng la dikeletso, jaaka batho bale Baiseraele ba ba neng ba swela mo sekakeng ka ntlha ya dikeletso tse di ba gogetseng mo go bueng maswe ka ga Modimo le Moše. Rara wa rona yo o mo legodimong ga a nke a direla batho ba ona bosula ka go ba abela se se sa tshwanelang, gongwe a ba abela ka go ba tlhokisa sengwe. O re abela ka seatla se se bulegileng, o dira ka molemo le ka go nna Motlhokomedi wa nnete.

A re ithuteng go ineela mo tebogong le mo boitumelong jwa go itumelela, le go lebogela tse re di abelwang ke Modimo, re o ngongoregele e seng ka sepe. Ke Modimo o o itseng tse re di tlhokang, gape re tlhomame mo kitsong ya gore botshelo jwa rona bo mo seatleng sa ona. Ke keletso ya rona batho gore re itshwarelele mo botlhankeng jo Modimo o re ntshitseng mo go jona. Rraetsho yo o mo legodimong o re diretse bopelotlhomogi jo bogolo ka go re abela Morwa yo o tsetsweng a le esi. A bapolelwa mo koteng gore mongwe le mongwe yo o dumelang mo go ene a nne le botshelo jo bo sa khutleng. Lefoko la thero ya kajeno le re ruta gore re lebe mo sefapaanong, re dumele mo go Jesu Keresete yo o neng a lepelelwa mo legonnyeng ka ntlha ya maleo a rona, a swa, a fologela mo moleteng wa molelo, a tsoga ka letsatsi la boraro, a re direla tse tsotlhe tseo gore re bone botshelo jo bo sa khutleng ka go dumela mo go ene. Ka thata ya Modimo re pholosiwe re se na sepe se re ka ipholosang ka sona, ra fodisiwa mo botlholeng jo bo bolayang jwa noga e kgologolo e e leng Satane ka ntlha ya ga Keresete Jesu, Morena wa rona. Modimo o itshwarela maleo a rona, o re pholosa ka bopelotlhomogi jwa ona ka ene Morwaaona Jesu Keresete yo o neng a swa a se na boleo gore rona baleofi re pholosiwe. Re ka tsamaya mo sekakeng, re ka wela mo dinokeng le mo dinokaneng, mme re a dumela gore Modimo o tla re abela se re se tlhokang, le fa re le mo kemong e e ntseng jang, gongwe mo sebakeng se se ntseng jang sa botshelo jwa rona. A re lebeng Jesu Keresete ka go dumela mo go ene fela gore re pholosiwe. Modimo o itshwarela maleo a rona, fa re ikwatlaela maleo a rona, re solofetsa tlhabologo, re ikanya thapelo ya tumelo, fa o tla re direla ka bopelotlhomogi jo re bo diretseng ke Keresete. Jesu. Ke ene yo e leng Mmueledi, le Moemedi wa rona. Morena, Modimo, o re rute go go ikanya ka metlha, ke raya, le fa re le mo sekakeng tota. Amen.

9. Thapelo: Rara, o nne le rona mo sebakeng se re tshelang mo go sona. Ka bopelotlhomogi jwa gago o re femele mo bosuleng jotlhe le mo thateng ya ga Satane. Amen.

Thapelo ya Morena: Rara wa rona yo o mo legodimong ...

10. Sefela sa 93 - 86/91

A kagiso ya Modimo e e fetang tlhaloganyo yotlhe e boloke dipelo tsa rona le maikutlo a rona mo go Keresete Jesu, Morena, Morepholosi. Amen.

Thero eno e kwadilwe ke S. E. Sithole, ka ngwaga wa 2011.

Kgatiso le go rongwa ga dithero tseo go tshagediwa ke kopano e e bidiwang The Lutheran Heritage Foundation.